

焦氏澹園集

焦氏澹園集卷之三十六

四言古詩

宗人時中之南鴻臚索余詩爲箴弦之佩作
此與之

炎帝開天垂仁創制爰及西周眷彼苗裔寔始焦
城離疆啓世維陝有焦古曰名都胙土命氏此其
權輿有芴孫子基時星敷代易世疎本根一氣譬
若干江同源派異念茲厥初慨焉以喟猗猗令族
來從宛陵有壁在懷和風鬱蒸匪我則阿寔宗之

英觀光上京音微日振遨遊冬春載觴載詠豈無
他人不如同姓攜手亡何周南以遷孰是典司曰
臚句傳何時復來一別三年漢有延壽經學之宗
亦有孝然飛聲青龍和談遂飲奕葉清風峩峩德
素開我後人庶其繩之以慰所親匪仁曷仗匪善
曷敦一簣非微爲山可至千里雖難脂車策驥華
胃遙遙孰敢不厲

焦氏澹園集卷之三十七

五言古詩

贈王東崖先生五首

結髮抱奇氣唾眎豪俠儔風塵日骯髒稟性寡所
謀君屈起東海高論戛琳球陳義狎六籍浩氣吞
九牛片言一指顧四座皆回頭精深魯鄒意爛漫
東南州木石生羽翮況乃知者流快哉千載會膠
漆忽以投

江水浩無極烟波迴且深扁舟一朝去邈然不可

親先生靜者流縛屋東崖岑微言自剖析墜緒恣
幽尋荆棘莽道周義和翳空明那能千載後獨契
黃虞心

商風天末起中夜隕霜籜有美三春花朱條忽銷
鑠古人結交驩意氣重山嶽俟俟豪華子朝暮見
榮落明晦自有時所貴善斟酌懷哉坦蕩人永不
負然諾

峩峩陵上松下有千歲苓采之欲相贈爲君延修
齡道遠不可致物薄誰爲珍臨風空佇立歎息此

微誠

孔丘豈驕淫老氏戒睢盱世焚自燿熠至道歸冲
虚所以古人心澹泊足自娛如何夸毗子逐逐窮
六區先生謝塵埜闇然中林居天刑忽自解守雌
意晏如邇來六十載沈賞鏡玄機眞陽伏兌氣純
白鄰太初行行千里駕去與元化俱

送別

庭前有芳樹灼灼敷春榮秋霜中夜隕枝條忽已
零我有同懷子倏忽如流星生者日已垂死者日

已泯徘徊顧四海誰能喻中情子從千里至燕婉
須臾生含意未及吐長路從此征冷二清商曲翻
爲遊子吟豈無他人俱結交良有因臨歧空佇立
恨二不能平

黃鳥出幽谷嚶嚶自相求胡馬依北風悲鳴顧其
儔況我同懷友從此遠行遊明月照苦顏嚴霜生
敝裘豈無盈觴酒顧望莫能酬緬懷河汾子上書
曾淹留弦歌嗣音微抗志齊軻丘斯人雖已歿千
載有餘休遠業非一塗所貴善自謀

勉哉崇令德
可以繼前修

送李比部

昔我從結髮翩翩恣狂馳凌厲問學場志意縱橫
飛慷慨思古人自謂不足爲世俗薄朱顏容華翻
見嗤中原一顧盼千載成相知相知今古難千秋
一嘉遇而我狂簡姿得蒙英達顧肝膽一以披形
迹非所驚嫵婉四載餘昕夕長歡聚歡聚從今日
交誼跂前賢況君秉淵尚矢志義皇前順性奚矯
迹得道乃忘筌慚予非鍾期何以發清弦清弦中
座興音微振蒙鄙泠泠曲方調弦絕自今始山川

一聞之相去忽千里念我平生歡縈縈不能已縈
縈無終極行役自有期君子善尺蠖大道固委蛇
所貴志有行豈云繼塵羈行行善自愛無爲怨天
涯

別四子

子美姑孰英綽然標雅度在久志不渝接廣情無
忤散朗溢風颺慷慨出情愔豈其文豹姿終隱南
山霧

王生吾黨彥天然有勝質和易向人羣耿介懷私

實玄珠逝欲探白璧寧與易凌霜君自知詎必歲
寒日

幼齊信才士文鋒振音響氣隨萬馬奔思逐層雲
上雅意薄時流結交盡英行江山自阻修舍情宛
相向

陳生青雲器居諸時與競良書坐長擁高文自成
詠飲酒見冲襟論交剖真性古道日悠悠微爾誰
與振

悲風響林木天地何冥冥客行歸有時游子不遑

寧良會在須臾一觴聊爲傾仰視日月馳顧盼生
衰榮盛年難久居所貴千歲名努力各先登一慰
平生情

送史比部

逃虛罕同人絕弦思異代豈無嫵婉儔知音不可
待何圖解后間獲與英遊會英英軼時流奮跡階
雲霄秉筆屬西署推轂盈中朝風塵耻稅駕訪友
就林臯林臯雖窮廬我心殊自廣片語喜膠投千
秋脫羈鞅望海恣大觀披雲愜高仰高仰我方愜

離緒倏相嬰，潛虬無近韻。霄鵠有遐征，知言分可
悅。心賞遙難并，遙遙難久居。歲月一何速，九淵當
自珍。千仞誰高躅，君其振英風，於以醒頽俗。

賦得明月照積雪

積雪皓曾林，華月生東方。靄靄停飛閣，朧朧含洞
房。漸喜輕雲斂，復覩流風翔。連輝無礙影，竝采有
殊光。舒圓一以眺，俛仰增妍芳。星漢屢淹薄，淒清
未渠央。內朗境逾適，賞勝情彌康。獨慙郢人曲，吟
弄不成章。

贈別

駕言發上國四牡何駸駸出邁遵長阪回望隔城
陰傷離豈無念攬轡多壯心悠悠懷往路遙遙指
故林故林渺何許禪房俯烟際青松宵迴薄素水
縈迢遞往還餘十載倏忽如夢寐聊指區中緣仍
偕塵外契舊契與新知兩兩對嘉辰繾綣遲莫日
緬邈平生親幽尋協要妙冥討謝囂塵那知歡愛
日翻爲行路人行路復遲遲道夷竟誰領汎有故
迷方沈空亦陷穽何津舟不擢是路車可騁忘言

意轉親攜手夜方靜靜夜未渠央歧路苦參商後
會未可期寸心難遽忘何當徑寸珠舒之照八方
迷途願有濟一別永相望

三餘

林端木葉下蕭條冬已深巖巒生暮色風雨激清
音虛庭屏氛雜山窗凝宿陰坐令三餘言偶與一
日并圖版共輝映樹石相陵臨人往有遺書客散
自鳴琴寂寂高齋晚誰明還賞心

秋日瀛洲亭講業作

道勝情可捐心遠地彌隙林臯颯已秋蓬山澹將
夕清曠對高槐虛明臨廣液古藤閒自度嘉樹勞
成積亭空山翠墮風定水花碧況復聞清言疑義
共剖析敢辭九朝勞終憐寸景戢矢心游太初永
謝囂塵跡

和淵明九日閒居

薊門寒事早虛庭菊已鮮風來何蕭颯吹此自成
妍況復逢嘉辰感茲時運遷人離秣陵樹鴈下廻
城烟徘徊鶴林遊騁望龍山顛千秋人代空勝事

從流傳虛疊何足嘆寒花聊解顏閒居有深情長
詠逍遙篇

聞西陲捷音

羽檄邊庭起馳烽達建章兩川妖氣入虜陣精且
強天王按劍怒徵兵集朔方熊車出細柳魚貫度
飛梁雙鞬明皎月雕弧生嚴霜威稜激將士況乃
胡運僵長蛇一朝翦奔鯨千里傷函轅方解帶曉
武盡歸疆伐罪龍溝曲弔民洮水傍愧予鉞刀材
夙志在疆場何當埽餘氛談笑淨胡羌功成辭上

賞千載姓名揚

嘉善寺石壁

平生寡所營幽期在林壑及辰訪雲根巾車蔭蘭
薄山阻覺徑紆苔滑嫌足弱危嶺冒綠蘿空庭下
鳥雀崖傾石欲墜澗折泉如約一線喜披豁雙壁
驚峭崿行看巖腹穿坐知谷口拓朋儕笑相顧文
酒時間作風徽結篇翰嘯傲寄杯勺誰言賞心遲
投老幸可託

荅楊密雲寄丹書

青鳥來雲中翩翩墮嘉藻上言勸加食中及長生
道一淨乃胚胎三元若凋瓊還丹術何神童顏後
天老捧讀長嘆息聞此苦不早靈骨夙多慙塵機
老未埽猶忻世緣薄清曠差自保晨興入鳳池夜
靜思鴻寶因感瑤華贈大藥期精討茂宰卽神仙
風塵亦瀛島葉縣鳧舄飛勾漏丹砂好何當懷中
方爲我悉傾倒身世竟飄蓬榮華日枯槁猿鶴與
沙蟲變化何草草願言謝纓紱洗心游浩浩從君
去不還攀星戲穹昊

孫子荆酒樓遺址在今石城莫愁湖側唐李
謫仙同崔侍御汎舟往尋之歡飲達旦風流
文采與江山相照映而樓之荒久矣新安孫
子真慕其風尚慨然以興復爲任表先哲之
遺蹤增舊都之勝槩異日韻人勝士憑高弔
古有不嘉其用心者乎乃爲詩以導之

澄湖抱石城飛翠橫空斷烟霞互明滅爽氣亘清
旦旁連孫楚樓突兀出天半疎簾面青葱下瞰綠
篠岸竭來謫仙人拏舟一遊款綺裘馭長風彩筆

燭銀漢篇章至今垂字字星斗爛耳孫有高懷撫
景發悽惋枕流風尚存凌虛勢已變興從荒墟中
髣髴還舊觀我老苦摧頽聞之再三歎作詩告同
心成此奇一段他日聯翩遊觴詠互賡勸快哉江
湖心適我魚鳥願

贈別

一落世網中去家八九年歸來齒髮凋顙影淒自
憐人生無百歲況乃多憂煎違已詎非迷負此區
中緣抱甕差自適攤書聊息肩矯矯巢居于千古

稱高賢

倚杖在東菑故人遠來顧殷勤相勞苦忼慷出情
悵爲陳離別來五見歲華暮日月東西馳觸目舉
非故靈藥能駐顏至人不可遇決策往尋之五嶽
恣高步

君爲二千石名爵豈不尊一朝解印去委之如浮
雲我貴物不羈道在能解紛千里倏命駕訪我林
中人炎炎明所避時棄轉相親抱影守空廬咄咄
那足陳

青天將玉笙吹向百尺臺對酒共驩呼如在緱山
隈金庭閼烟霞玉洞無塵埃長揖辭世氛拍肩追
洪崖英風凌八虛倏忽隘九垓將同丁令威千歲
一歸來

西園

林臯颯欲秋閒園自成步駕言城郭遊翻愜滄洲
趣臨深杳難卽躋險倏可度危藤緣澗上遠岫當
窻露崖壑旣盤紆竹木亦交互怪石森餘株清川
貫中路微雨逗涼颼煩暑漸以去同人自相將杯

酒豁情慆栖遲少日懷緬邈平生故流光豈不道
延賞未云暮詠歸各怡然撫景謝良晤

賦得秋風吹海水循甫席上作

開秋海岸懸空水共澄霽商飈一以生玄冥蕩屏
翳稍覺縠紋迴旋看沓潮會濤聲殷地雷樹色沒
遠嶼淒清日月寒淠瀼乾坤細大鵬怒且飛奔鯨
來倏逝憑陵詎有極搏扶自成勢何當風力微孤
帆指天際卓矣魯連懷泠然列仙馭蓬山信云遙
髣髴如可至

天關山同肅卿作

結念尋遠山杪秋出南郭青甸經崎嶇丹壁上岸
粵一髮長江渺雙闕巨靈鑿豈知鍾梵筵乃在松
桂壑樓因宿霧隱磴與流雲錯幻影標浮屠琅函
粲珠閣旁探虎穴幽小構星查縛山深語鳥驕石
瘦游龍攫曰余采樵人篷篚甘索漠服道形可捐
乞閒心自諾多君富藻翰識度兩恢廓長握五芝
圖寧使三花落未爲堯舜用聊向烟霞托終期功
成還名區踐夙約

花巖寺芙蓉峯

寒空聳危峯灼灼芙蓉萼連雲勢欲拔峭壁森若削樹頂接蒼烟巖腰吐朱閣崖陰積霰冷林合朝日薄靡靡饒木葉撼撼皆零落行行歲將徂冉冉老自覺抽身遠繒繳委志投林壑攜朋文酒偕縱覽心目豁悠哉古人懷恬然寄玄漠

獻花巖息心堂

花巖自名區面對天闕麓何當息心堂奇勝森在目下臨渺無地旁探如轉谷我來逢杪秋松杉向

人綠炯然塵土腸一旦濯冰玉幽深慮彌澹觴詠
會相屬歸路仍遲遲遠岫出喬木物情習俗勞畸
人戀幽獨緬懷弱冠年芸編寄茅屋星查自鳴鐘
夜半耿殘燭

田家二首爲吳次魯賦

中散豈不偉終以明自膏元亮中道歸棄官如逋
逃何如璜原叟白首臥林皋晨興事壠畝錢鏹亦
常操四體良已勤意適忘其勞不稼而取禾羞爲
達者嘲殘燈照風雨濁酒且自陶悠悠沮溺心千

載如相招

夙昔厭喧囂委身寄田廬榆柳覆茅屋綠陰盈前
除閒引月下泉灌我畦中蔬所冀營一飽意足不
願餘行看松嶺雲倦枕藜牀書有時會鄰曲酌醴
烹溪魚情親易成醉地偏來者疎優哉復游哉不
樂將何如

題董望峯逸老堂一首

董生淮海彥矯矯威鳳舉一劍龍醜黎英風動南
紀貪泉時自詠讒謗生意以歸來臥林臯了不置

愠喜謂天逸我老錄錄胡爲

會鄰里回頭知曲誤賞心爲景美鬢霜詎易
斧差可理愍彼平生勞幸茲一日止枯腸得酒澆
寧復餘塊壘我亦愛閒人何時相晤語題詩寄草
堂商頌聲振履

焦氏澹園集卷之三十七

焦氏澹園集卷之三十八

七言古詩

謁定山先生墓

千古人豪去不歸，空餘墟墓江之湄。
草木搖落滿林壑，蕭疎不受春風肥。
我來維舟奠椒醑，薜荔荒叢泣山鬼。
亂峯欲暝江氣寒，老蜃吹雲白日死。
建章千門燈火時，從臣爭上鰲山詞。
封章慷慨羣小忤，抽身一去無還期。
明月長遭魚目妒，從古紛紛那足數。
古塚猶令壯士哀，不見當時狐與兔。
嗚呼

轅下之車空局促誰使遺芳照青牘
斫地長歌巷伯篇習習悲風振林木

謝公墩同友人作

金陵佳麗帝王州往往古蹟藏林丘
冶城逶迤一墩出奔迴灌注長江流
典午英賢夢籍籍獨爲蒼生起安石
西州花樹春溟濛林館歌鍾日盤辟
苻秦鼓輦動地來投鞭勢欲吞淝淮
羽書憑陵急風雨圍棋決賭何徘徊
胸中別有平戎策百萬須臾卷如席
中宵邊馬無留行八公草木皆人色
功名

兒女自平章一着聊持荅廟堂
棋枰未收烽火息還向荒墩臥
夕陽勲業凌雲竟何似古人棄之如
脫躡勝負纔堪供掩鼻況把山林易青紫
君過古墩行且留心知自是公之儔
小出經綸試花縣決策終隨鹿豕遊
飛翻逸興真矯矯弔古升高頻絕倒
燕子堂前非昔時落日山中空小草
風流今古鎮常新我屋公墩共隱淪
不須名字間題校長掃
青青作主人

送界公遊清涼

界公行脚處烟水晉陽深飄飄一笠小飛度萬雪
岑入門頂禮山中相香氣鐘聲宛相向清風入手
十八盤積雪參天幾千丈君其着眼無模糊一草
一木皆文殊牟尼如意隨方現朗照諸天及五湖
怒電蒼虬忽千里蒲衣童子定誰是回首人間熱
惱林等閒翻出清涼地踏遍千巖春未闌層層樓
閣一毫端歸來更著楞嚴論應作遺經鼓吹看

送蔣道力還潭州

朝登承明廬夕歸滄海涯人生得意豈不樂一日

思親生鬢華憶昨戰勝長安日動地香名喜堪挹
金馬春明擁佩看銅龍曉闢排雲入帝城紫氣日
網緼親舍其如多白雲鄉夢三更懸馬首離腸九
折迴車輪曾共瀛洲三月住可憐聚散如萍絮高
館張燈話夜分霜落梅花月當戶明日征帆望海
雲搏風鴻鴈惜離羣長江片月迷孤影萬里烟波
也夢君

征虜將軍出塞歌

獵獵邊風動蕭蕭胡馬鳴明光傳紫詔飛將出長

城回首旄頭天北指鳴笳疊鼓紛紛起龍庭黯淡
陣雲高一夜天驕度遼水中朝羽檄大徵兵烽火
甘泉達旦明老將漁陽舊無敵俠少交河新有名
金鉦直擣雲中野練甲平臨黑山下返旆黃河爲
倒流揮戈白日應回舍草頭一點疾于飛生縛單
于馬上歸紅旗不動和門影白羽先開大漠圖
明主恩深軀命薄照腕并刀霜錯落肯令越甲鳴
吾君坐看猿臂圖麟閣歸來飲至紫宸朝珠勒琬
弓翡翠袍爲問漢廷功最著祗今誰似霍嫖姚

盆菊吟

林莽蕭疎歲欲闌
霜華射地明琅玕
藕花夢冷鴛鴦浦
白榆搖落西風寒
盆菊君看開正小
錦石高雲相照耀
翠色離離秀可餐
浮香冉冉寒仍峭
翻羞桃李當春生
淺白輕紅剩有情
連枝無那妖嬈態
一夜空驚風雨聲
高人避喧來海嶠
靜女無言偏窈窕
時逢金令意轉佳
移向玉堂看更好
幽姿不與凡卉爭
靈氣曾延千萬齡
青霞絳闕有時去
歲寒且締同心盟

和韓昌黎石鼓歌

周原石鼓奇且閎幾年蹤跡沈蒿萊世遙幾得睹
拓本殘章斷碣如瓊瑰何人輦載踰千里至今照
耀黃金臺河傾崑崙勢曲折雪壓泰華高崔嵬蔡
邕嵇康那足數石經奔走洪都齊回思共和歷隋
代披荒斲古其誰哉天昏地慘鬼夜哭至寶欲出
風雲埋韓韋博雅始一識鄭向搜索窮山隈四百
六字傳青簡二千餘載開蒼苔龍畫旁分爪蟠互
蟲書深刻神翦裁求致太學竟不果鳳翔落莫空

山崖皇明文物邁前古冲融雅頌相沿洄辟雍橫
陳雜黼黻廟堂貯列參樽罍想見周王盛羽獵從
臣撰述皆奇才聲詩炳蔚垂日月雕鏤宛轉回雲
雷之杲山泐跡半掃漢水鼎沈名已灰豈知籀往
蹟自在摩娑細讀如談詠近傳峒嶠碑更偉青字
赤石鉅以魁宣王雄俊神禹智何異臯祖於雲來
神物出沒兩不偶昔何揜翳今昭回安得移之置
一處擎螭披鳳心眼開春風卻立讀萬過咎繇吉
甫親追陪嗚呼咎繇吉甫長追陪

帝京篇

星躔箕尾光耀滿皇州共覩天居壯安知地肺
浮太行千里排空下黃河幾曲回奔馬日月高臨
碣石門風雲長護幽并野紫殿氤氲接上台銅龍
雙闕徹明開柳迎御仗垂垂發花拂仙韶裊裊迴
千門窈窕羣官入鳩鵲虛明鴈鷺集上公車轡挾
星飛內史衣香沾霧濕星飛霧濕日悠悠更有驕
奢恩澤侯金張夜月連錢騎趙李春寒翡翠裘說
客常持小冠出公子時飛高蓋遊追遊翠黛芬相

接含態含嬌情未歇相看蟬鬢步生花半度羊車
行就葉日移調馬埒雲擁鬪雞場緩轡回長樂鳴
笳出未央東觀風光歷未能西山攬轡復堪登濺
濺寒水懸千澗豔豔朝霞羃九陵九陵千澗鬱叅
差仙觀僧藍兩蔽虧欬飛校尉偏能獵供奉才人
總解詩西湖歸路酒方酣十里芙蓉萬頃潭錦纜
瓊舟連塞北水秧堤柳類江南漢主離宮那足數
秦關百二空雄武何似車書今日同萬方玉帛歸
明主門掩青春著作廬花光夜色映窻虛時平

願獻三都賦肯學相如封禪書

喜雨

畫樓五月停紈扇複道高甍喜飛霰飄絲亂滴未
成聲歊景炎威如減半是時白苧動微涼酌酒凭
闌望未央雲膚寸寸帶山起雨足垂垂到地長赤
亭氤氲火雲會薶麥無秋禾黍悴豈謂桑林精禱
通高天萬里回生意已知穴蟻有先謀更見山蛇
毒影收池溜長流涸廩積林芳欲萎枝還抽蛟龍
勢披挾電至間作雷霆鼓增氣達旦中宵未肯停

草間樹色生蒼翠乃知雲漢未爲災豐歲旋從靈
雨來耒鋤四出歡聲洽一日 皇恩徧九垓

燕子磯放歌

明陰變無窮開霽色若絢川柳發青條山花吐紅
豔長安花柳正芳菲仙觀僧藍映翠微連宵積雨
淹龍藏一日新晴上燕磯燕磯近出都門外羣從
驩遊擁軒蓋披拂今同石壁行衣冠似入香山會
山壁逶迤陰靄連氛霾如妒豔陽年高城雨腳下
平地隔檻浪頭黏遠天早起西來風勢急稍喜孤

亭漏斜日川上春容向曙開岸邊天影隨潮入渚
蒲汀芷淨如洗陂鳥沙鷗閒自逸北嶺烟消翠黛
橫南峯霧盡青螺出語燕鳴鳩雜棹歌江頭花底
柰春何醉來時作洛生詠書罷還籠道士鶯絲竹
何須羨金谷應詠真堪續永和幾歲京塵緇化素
賞心何幸兼良晤勝侶旁探玉笈文靈源不藉青
鸞度過逢且挹洞中霞世事還同草間露桃花日
日武陵遊一任藍輿自來去

壽座師少傅許公分得黃山

黃山矗立千萬重
白日照耀金芙蓉
軒皇馭風攬八極
問道來訪浮丘翁
鈞天樂奏鸞鳳舞
至今林壑含香風
丹竈冥濛翠猶滴
綠烟消盡澄潭色
金燈閃倏知有無
瑤草葳蕤亂朱碧
先生縛屋山之陲
三十六峯相蔽虧
落筆雲霞常在手
襟期欲與山爭奇
一從謁帝來天上
瑤池玉署森相向
琴瑟眞諧清廟音
珪璋直付明堂匠
紅藥時陪禁裡仙
白頭仍作山中相
諫書三上辭承明
魏闕滄洲空復情
龍庭回首風塵靜
鴻舉遙看羽翼成
歸去來

天都下紫芝盈盈日堪把已知靈洞映花關更有
清池照深夏六月六日天貺時聞說彭錢降此期
壘樽滿貯長生酒樂府新翻上壽詩延賞不知年
攬結自成趣南榮不辭畏壘遊任公自愛蘭臺聚
追隨日日駐仙都會見乘魚出烟霧

東山草堂歌送楊子漸給諫還平原

高巖萬木流雲氣白石巖峩巧相翳石上蒼苔雨
作痕崖前古屋藤垂地草堂面面傍東丘彷彿青
天十二樓鸞笙縹緲烟塵隔羽扇消搖洞壑幽竭

來聊爲蒼生起一日褰騰萬人裏玉珮時從瑣闥
趨天書幾捧雲霄至頻年籌策獻凝旒黃石山中
約自留郊原舉手笑相別翩然意氣凌清秋歸來
舊隱多叢桂石室猶藏藥珠秘瑤草琪花幾度春
玉泉靈藥三千歲只愁宇內須經綸未是堂中穩
睡人直看名上麒麟閣更乞天涯雲水身

玉陽草堂歌爲沈奉常作

隱侯詞賦東南美一生嘯傲山川裏浮玉之南構
草堂門對澄湖三百里宛轉丹梯日月開參差翠

檻風烟起千巖蕭颯常欲秋一壑冥濛得非雨水
禽格格鳴斜暉江草江花坐不歸手把黃庭閱清
晝日暮流雲空濕衣一自抽身臥烟嶂縱酒彈碁
十年上天目徒藏金簡書東山久鬱蒼生望邇來
驅風華蓋前緹扇朱轡霄漢懸照耀仙班蒼玉珮
芬芳畫省白雲篇魏闕江湖心不改圖中咫尺留
光采一日移來裴几傍拂拭徘徊生感慨濤雪渦
雷雙眼明臨流幾欲濯塵纓赤霄碧浪知相接爲
借星查犯斗行

雨花臺歌贈陳盡卿

行遊城南今幾回丹楓欲老菊半開高座道人有
精舍相與推挽升崔嵬往事風流如可掬況復陳
君起空谷共推謝朓解吟詩又道周郎能顧曲茅
齋門巷接烏衣六代繁華有是非尋真弔古情何
劇載酒彈棊樂未稀高臺一望紛烟樹笑指城中
讀書處故篋長懷霹靂春振衣莫厭風雲暮君不
見明堂大厦須良材一丘突兀何爲哉

雲池篇贈王子美明府

閒莫如城邊雲清莫如城下池鶚冠燕坐者誰子
臨水看雲日委蛇蘇門恣嘯歌東山耽酒宴楊雄
一上甘泉宮潘安已試河陽縣四野風恬獄訟稀
千家歲熟桑麻遍見說爲官不愛錢陶潛赤手且
歸田門前垂柳長無恙池上流雲自昔年秀色帶
空餘百丈溶溶洩洩如相傍淮水新添朱雀橋王
家還住烏衣巷細沫浮花一鏡開雲能出岫亦能
來如車如蓋浮吳樹汀草汀洲近越臺水榭雲華
淨深夏似向屏間開罨畫孤飛杳靄珠歌遏一片

澄泓翠娥寫玉壺水簾湧相羊祗覺山林日月長
舉酒從今爲君數更看三萬六千場

雪湖老人墨梅

湘江水落零雨絲羅浮遙遙夢難期華光一逝孤
標絕貌得寒梅第一枝肌膚綽約如冰雪翠袖輕
盈弄明月籬根竹外無人知瘦影橫波共清絕劉
生劉生老彌壯半幅輕綃傳意匠剡溪美人襟袍
奇對此悠然得真賞披圖颯颯生微風春入寒巖
雪漸融恍疑身向孤山道十里林巒香霧中

梅花行新安張梅友七十賦壽

君不見梅友叟七十華筵初命酒又不見梅友梅
白白紅紅相對開賀客升堂錦繡段交錯花前互
璀璨堂下翩翩動彩衣兕角犧樽映花薦新安山
水之窟穴聞說梅花更清絕數行粉豔白於齒幾
樹天斜紅勝頰憶昨曾從江上移點綴繁英漸滿
枝絳袖着香渾自詫玉屏照影轉生姿起舞婆娑
忘夜久酒船動鱗紅縵露濕烏巾總不辭幾人
得共花爲友夢醒梨雲山月斜裁詩東閣興偏賒

願君從此長爲主更看東風百遍花

焦氏澹園集卷之三十八

焦氏澹園集卷之三十九

五言律詩

將之陽羨留題退園草堂二首

千古陶潛逝何人更閉關
世情看白髮吾道獨青山
蒿目終何事灰心可駐顏
子真有幽興谷口未知還

貧病緣何事猖狂祇自哀
言尋青嶂去聊避白鷗猜
薪木宜時護柴荆可浪開
高懸徐孺榻未許俗人來

同李比部永慶禪房小集二首

一笑同幽事移樽向夕陰長風吹片雨蕭颯動高林
自愛丘中賞還同澤畔吟相看意不盡涼露滿衣襟

化城圍野色空翠落秋陰與客開香積談玄傍竹林
梵天留宴坐花雨助清吟一酌那爲貴因之披素襟

靜海寺送別

江閣一相送愁心生二毛情知終是別聊欲永今

宵意與雲俱遠魂隨酒暗銷重來還底日知爾不
辭勞

挽帝生堯臣三首

離別豈不苦人生會有趨那知燕趙去便作古今
殊說易慚關朗亡書問摯虞徘徊昨日事灑淚自
生芻

吾久知交態如君復幾人回頭悲宿昔開眼漸風
塵名豈論文著情因問字親所嗟寒色甚轉見後
凋身

尚憶長歸日風期迴莫攀肩輿留白社揮手謝青山
爾已齊生死吾猶惜往還至今西澗水流恨日
潺潺

羅生挽詩三首

秉羽早從軍乘時誓策勲弓刀爭白日圖畫失青
雲定遠空投筆要離近築墳那能羞左轂越甲欲
鳴君

高允傳書日羅舍絕命時爾曹今短世吾道復奚
爲靈爽風雲颭从游日月私千秋看意氣誰爲托

孤兒

中丞新按節尚一試昆吾志士泥塗盡英風江海
孤那知長夜隔翻訝尺書無白馬江干去翩翩愧
病夫

題顧侯明月軒二首

上築鳳城隈亭軒傍水開閒門明月下芳草故人
來說劍光生座彈碁霧濕苔忽聞鷄唱動起舞思
悠哉

夜榻吟方穩春亭飲亦兼
祗緣花泛泛翻愛月纖纖

纖薄露難過砌微雲不滿簾所歡時宴坐清影若
爲淹

鄔女翼李文仲羅敬未李承烈盛伯年李君
錫集冶城飛霞閣分得巾字

雙鬢逢殘歲逢山載酒頻日吾悲過客星覺聚賢
人幽賞知難盡沈冥自可親松蘿寒愈碧相映白
細巾

送元甫還武昌

候館冬難暝愁心生別前人今千里去月傍片帆

懸文字誰同調聲名爾少年江離如可贈莫惜數
行傳

送敬未還豫章

送子松門去其如芳歲殘祗應爲客久不憚獨行
難驛古梅花淨江空鴈影寒壯心知未落時倚佩
刀看

舟中口占別思兼

爲別何容易移家常苦遲駕言搖桂楫況復是蘭
時樂事春增劇交情老更誰未應天畔月長自照

相思

送文仲遊薊門

南征意不盡春水亂流行詎是輕千里其將賦二
京孤琴迎暮雨罷馬度空城到日黃金地應多白
髮生

永慶寺竹院納涼分得烝字

結夏從初地高林散鬱烝茶香透深竹人語隔垂
藤把臂連中散談心失小乘琅玕青可刻聊欲記
吾曾

湖西別業二首

近郊秋氣早行散
滌煩襟坐愛澄湖影
涼分碧樹陰
疎花遙對酒
纖月曲通林
況復高賢處
彌生懷古心

子荆沽酒地遺址半雲扃
勝地猶生氣閒情似乞
靈蝸書堦蘚碧鳥破晚烟青
無限滄洲意鳴榔隔水聽

寄宏甫二首

歸田仍作客散步自安禪
去我無千里相違忽二

年夢醒江閣雨心折楚雲天寥落知音後愁看伐
木篇

風雨秋偏急懷人鬢欲絲飄零遠俗久歲月著書
遲獨往真何事重過會可期白門遺址在相爲理
茅茨

九日登謝公墩分得今字

謝公臨眺處勝日一招尋我輩還時序荒墩自古
今天空江影淨木脫鴈聲沈不有茱萸酒其如搖
落心

和明甫移居三首次韻

卜居饒物色往往慰幽栖書可開新帙花仍落故畦
谿深夕鳥度門靜古藤低卽此堪投老風光似竹西

多君芸閣齋老就竹林閒高臥捐塵慮長貧有好顏
開琴心轉寂投轄客忘還爽氣朝來劇葱葱近北山

韓康非翫市藥肆亦逃名坐隱無過奕長吟不礙耕
渚花藏客語檐鳥荅書聲投策青林外飄蕭白

髮

集國寶振藻堂

彩筆題名處高堂半客裾銀鈎搖几席玉珮偶琴
書茗竈飛烟近花龕片月初未能參麗藻延賞愧
空虛

訪茂承一首

愛爾聲名早相過坐隱囊丹青古人輩詞賦少年
場斐然芸花潤書帷蘭葉香蓬蒿堪翦伐吾不愧
求羊

挽方思善太守二首

世道晚無賴，哭君彌斷魂。
歌謠自楚越，風采落乾坤。
白日泉臺闕，青春草繁祗。
餘風謾謾長，似李膺門。

意氣深投漆，文章高築壇。
身驚朝露盡，人逐夜舟看。
積雪平原慘，悲風澗水寒。
翩翩淹病色，空愧白衣冠。

人日南郊僧寺作

人日仁祠好，春風動鳥聲。
相期載酒往，共作探梅行。

行澗水溶溶淨林芳轉轉生禪棲吾自適非爲薄
時名

初夏同馬李二明府姚大名吳觀察集德載
谿園

秘苑人初集谿園夏亦芳桐陰低戶碧梅子亞枝
黃賦豈登樓著情因解帶忘聯鑣一栖息瀟灑在
滄浪

王孟起百花莊

韓山明滅處聞有百花莊流水鳴虛砌垂楊出短

墻帶經鋤麥隴負日臥藜牀何謝茱萸泝居人等
姓王

祈澤寺

紺殿銜山古清川帶薄長樹身迷日月碑額見齊
梁旛影風前靜曇華劫外香龍堂況幽絕一酌世
緣忘

嘉善寺蒼雲崖

噴岼開古壁陰靄款禪扉巖乳寒仍滴山雲濕不
飛天花空處沒春草定中肥莫怪消搖久于焉願

息機

梅花水

梅花涵靜渚空水澹相搖旋自雲根出還隨泡影
消年深饒石髮坐久見魚苗只恐蛟龍動陰風滿
樹腰

崇化寺

僧寮來客少僻隲受春多竹嶼孤琴入花朝病眼
過酒鎗淹叔夜香積飯維摩坐覺幽期愜空庭閒
綠蘿

送張光祿北上

李郭同舟日離筵氣色開銜杯春雨過卷幔夏雲
來曰璧明調世黃金高築臺枇杷堪屬句時有大
官才

龍泉庵

水晶龍庵最殘春挾茗過世誰尊白法吾自狎滄
波古樹間僧老空林野鳥多無因留信宿清磬隔
烟蘿

齋居對雪

玉署迎長至，齋居澹泊時。
朔雲成雪易，宮線轉春遲。
枯樹寒鴟集，空庭華月滋。
瑤花紛可望，知有神期。

賦得雲近蓬萊

紫殿開南極，宮雲采采飛。
色因鰲石麗，影逐鳳池歸。
未覺爲霖遠，翻憐捧日微。
滿庭歌旦旦，虞帝正垂衣。

送鄒太史歸安成省覲

雲望憐華髮，星言下紫微。
況君晨省日，兼是晝遊時。

歸品味分官酒斑斕半錦衣螺川春有燕行路惜
光輝

送全太史冊封趙藩便歸省覲

上國封章重詞臣寵命饒鄴雲低漢節川柳引星
輶烏鳥秋先急粉榆望不遙莫言歸覲易恩自紫
宸朝

送袁太史冊封楚府便歸省覲

倚門親夢遠分土主恩寬豈謂一朝別先成兩
地歡綬花晴自媚劍氣晚生寒莫以鄉關滯雲霄

待握蘭

送朱太史冊封周府

十里垂楊色離心不可裁豈堪今夜月仍照蕩渠
杯喬與黃河遠人看金馬來梁園詞賦出轉見長
卿才

送蕭太史冊封淮府便歸省覲

寒星隨使節驛路滿光輝赤社分茅日蒼梧擁傳
歸江魚迎浪白林橘近秋肥不盡趨庭戀微風生
賜衣

送劉審理還亭州兼簡宏甫二首

送遠紆征轡披襟得上標
路分燕市酒帆度楚江
潮殘月明疎鬢寒風急
敝貂鄒枚詞賦在應有兔
園招

故人棲遯久翻訝尺書遲
日月空相憶雲山不可
期雪殘江樹夜鳥下晚鐘
時牢落還誰仗因君但
益悲

題黃生大有山房

龍臥耽高尚雲蘿洞壑深
草繁當戶帶竹度隔谿

陰小酉藏書日中條避世心仙羣如可下
鶴有遺音

贈吳封翁一首

上國褒封錫西亭芳譙開川原一以眺雲日共徘徊
白雪留蓬鬢青陽泥酒杯庭闌多喜色愛子在
霜臺

暮春署中作二首

寂歷蓬山暮春華脉脉歸曲池新漲滿高館亂花
飛緩步慙仙籍端居契道機遲回溫樹影行坐是

恩暉

餘春歸閨月省署自留芳地有池亭氣花生澗壑
香閒多疎酒盞老至減書囊尚憶東方朔酣歌銅
馬傍

神策門城樓望後湖得開字

爲愛澄湖色高城載酒來峯巒雲外出亭館鏡中
開遠渚縈烟細殘潮挾雨迴時難聊騁望長憶濟
川才

贈林生還莆陽

綠酒青門別悠悠去路長川原更臥起雲木半蒼
茫落日羣峯暝歸舟一葉黃嚴陵行在望吟眺未
應忘

追輓張都諫二首孫左諫正學索賦

致主天闕杳投身夜壑幽渚雲低宿草林日澹荒
丘志已千人廢名因一疏留艱難歸骨處遺恨托
松楸

久戍應非願危言衆所期封章身後重諫草篋中
窺天遠龍髯墮山深馬鬣移掖垣梧尚在挺挺出

孫枝

送梅景靈之丹徒

山川望不極形勝鱸堂分鐵甕開丹幄瑤篇動白雲
稠烟寒樹色落日亂江文匡鼎談詩處風流獨憶君

送陳孟芳之天台二首

石梁名勝地未易賞心諧以爾談經去兼之丘壑懷
泉聲喧曲澗山翠落空階散帙門人至青燈對夜齋

少時隨研席老至共京華旅況馮君慰行年愧我
加名山饒石髓深洞出胡麻有得勞相寄無言去
路賒

送王行甫還黃州

爲客風塵久蒼茫憶所親垂楊生暝色芳草遲行
人綠酒堪攜手青雲已致身唯應歸鞅駛猶及故
園春

李嘉紹挽詩二首

夢醒驚鄰笛書來薊北城倉皇失知己涕淚憶平

生白雪誰爲和青樽空復情慈親憐愛子恐見玉
山傾

地下修文久天邊賜玦歸因君不可見轉覺素交
稀愛日心如在乘風事已非秋原多宿草一慟淚
霑衣

送歐陽宜諸守平樂二首

相送昭潭去無言鴈亦稀山川足形勝徒馭有光
輝問俗風猷播行春謠頌歸懸知合浦葉遙向洛
城飛

相逢元不易分手卽前期豈復辭難阻行當慰別
離功名邊郡重歲月主恩私忼慨臨岐意無勞
行路知

邵武丞鄭公祠名宦奉常王大父

何年仙尉往血食尚人間爲是哦松處常疑曳杖
還恩波深鹿水寒色壯龍山伏臘蘋繁外豐碑古
廟閒

鄭處士祠鄉賢奉常王父

鳳歌千載事龍臥一丘成早就終焉志人傳達者

名雲山遶風昔俎豆見平生誰續先賢傳徘徊空
復情

翟德孚生日約同志賦詩壽之余得二首

初度重陽近長筵風日嘉興饒呼白墮地勝更黃
花法已三乘悟文堪十賚加猶嫌名字在門巷幾
回車

有酒何妨社無弦始是琴談能飛屑玉書欲比懸
金何胤中林賞韓康大隱心坐欣年冉冉不受二
毛侵

胡安人挽詩

彤管音徽盛玄扃日月空淚痕消夜燭愁緒亂秋
風珠鏡鸞疑在瑤琴鶴怨終惟憑少君術髣髴見
修容

徐氏園二首

城市藏丹壑樓臺隱碧霄洞門行窈窕巖石上嵒
堯雪壁花龕近星橋鴈嶼遙就中堪戀賞欲醉未
還鑣

選勝來朱邸風華觸眼新軒窗臨水豁臺榭得山

頻嘉樹能留日名花欲殿春
暫遊歡未足小酌賴情親

贈楊學博二首

選勝山川美談經日月長
名堪齊服鄭行欲重珪
璋汗竹秋繁短芹羹午飴香
及門多達者爲問幾升堂

學舍山雲濕城樓河氣渾
長材淹冷局令子託斯
文藥火連更曙匏尊四座春
鱸堂知有兆士習漸還醇

王節母

鏤月成團扇歸雲柰藁砧空餘龍鏡色長罷鳳簫
音碧海雙珠出青山片玉沈年年畫梁燕應識歲
寒心

立春後一日治城送日常時方有悼亡之戚
維舟過福地載酒及嘉辰白雪留高倡青春別故
人悲歡不自意貧病許相親倘憶停雲約還來漉
葛巾

覽勝詩名出傷離酒力微春從昨日至人是隔年

歸舊雨期仍在行雲夢已非可憐洲畔鳥猶作一
雙飛

七日立春集肅卿宅同用人字

老覺韶年媚過逢意轉親一春纔此夕七日況爲
人梅閣含芳動蘭缸吐豔新朋簪喜披豁不厭舉
杯頻

送楊參軍之漳州

不擇漳江幕談詩暫解頤一官聊自隱萬里復何
辭鳥下津亭晚帆開壠樹移殷勤前路酒誰爲故

人持

贈陸生還晉陵二首

散帙鸚鵡林去經秋春復深如何搖落後獨有歲寒
心山暝花含夕門幽樹積陰求羊還爾輩虛薄愧
招尋

晉陵歸路渺相送片帆過曙色搖津樹江聲雜棹
歌詩名因客著鄉夢入春多所歎中年後情如離
別何

和余學士金陵登覽詩二十首

鍾山

名山雄帝里原廟枕神臯龍虎標形勝弓刀護寂
寥雲深埋劍履時至薦櫻桃王氣千年在靈祗夜
夜朝

牛首山

龍藏烟蘿閟牛山殿閣幽夜涼僧梵歇地迴佛燈
流樹影兼雲合林香過雨收平生飛動意何幸得
淹留

梅花水

投策長林外浮杯曲水隈影搖頻寫翠香冷不關
梅雨脚添新藻雲根翳淺苔煩襟端可滌欲去覓
徘徊

燕子磯

江蓼坐依微繁星落釣磯寒沙連野盡新漲浴天
低小憩村村暝前期事事非塵機吾已息不礙白
鷗飛

靈谷寺

法筵開浩劫沸塔自先朝磴石三休至松雲十里

遙禪心隨步寂客望對秋高不盡經行意頽垣起
暮簫

鳳凰臺

鳳嬉曾此處秋爽共登臺一望東南盡長江鴻鴈
來青林隨浦淑白石轉莓苔莫繼浮雲唱空傷蓋
代才

桃葉渡

吾聞王內史落日淮河濱花塢飛瑤札蘭舟載玉
人雕奩回曲岸彩袖隱平津珍重板歡意能無寫

洛神

雨花臺

南郭高臺迴乘春數散愁雨餘千嶂立樹杪一江
流地擁鶯花勝情兼水石幽角巾差自得端合老
林丘

方山

道者何年往深林尚故廬冷烟翻翠壁古洞隱丹
爐坐傍雲容斂行看樹色扶前山西逝水冉冉接
蓬壺

落星岡

樓堞新亭戍山川自昔多曾聞沽酒客一著綺裘
過霞舉占龍氣風期叶鳳歌悠然登覽處遺跡賁
巖阿

獻花巖

一上花巖寺迴瞻紫氣遙幽深臨絕壑突兀礙層
霄槎小星堪摘窻虛月待邀無人叅妙義旂影對
風飄

莫愁湖

水閣菰蒲淨城開睥睨斜懷人倚高閣落葉見平沙
眉黛餘山色鈿金但野花徘徊湖上月一倍惜芳華

清涼山

山有先師耿恭簡公書堂

精舍何年築高臺裊裊孤烟嵐收紫極氣色覽黃圖
飛鳥還哀郢吞江詎賦吳祗應游息地流恨滿平蕪

虎洞

大城東畔路小洞冒烟鬟落月烏啼急回風虎嘯

閒巖腰窺奧突石鑄漏潺湲況是宮泉近能清靜
者顏

長千里

長千古阡陌佳麗擅名都花月三春暮衣冠六代
餘橋星隨寶馬檀霧雜巾車絲管淹良夜嚴城鍾
漏徂

東山

謝墅維青舫蕭臺接紫城到門雙樹立隔岸亂峯
迎龍臥曾先達鴻冥愧獨行蒼生誰繫望懷古重

舍情

冶城

冶城開別館行散自逶迤巘嶸供清眺亭臺狎翠
漪星壇月影度藥圃露華滋望望三花樹遊仙若
可期

棲霞寺

古寺俯蒼茫東峯一磬長人天留色相臺殿自齊
梁乳竇流泉滑風巖藥草香采榮心不薄吾欲問
醫王

青溪

宛轉青溪步扁舟曲曲通竹烟籠罨畫花雨澹冥
濛豔雪歌蟬墮澄金酒蟻空良遊不知倦遙夜水
雲中

達摩洞

禪龕泐綠嶼石洞俯滄波風雨江聲壯魚龍夜氣
多停杯今日望飛錫向時過欲問西來意疎鐘度
薜蘿